



MSM Malaysia alami kerugian sebelum cukai RM13 juta



Oleh Wartawan BH - Mei 26, 2026 @ 11:35pm



MSM Malaysia Holdings Bhd (MSM) - NSTP/ASYRAF HAMZAH

KUALA LUMPUR: MSM Malaysia Holdings Bhd (MSM), pengeluar gula bertapis terkemuka Malaysia berjenama 'Gula Prai', mencatatkan kerugian sebelum cukai (LBT) sebanyak RM13 juta pada suku pertama tahun kewangan berakhir 31 Disember 2026.

Prestasi ini dibandingkan dengan keuntungan sebelum cukai (PBT) sebanyak RM8 juta yang dicatatkan pada suku pertama tahun kewangan sebelumnya.

Prestasi itu didorong terutamanya oleh purata harga jualan yang lebih rendah, pengurangan jumlah jualan dan kadar penggunaan kapasiti yang lebih rendah, yang telah meningkatkan kos penapisan seunit meskipun kos pengeluaran berkaitan input adalah lebih rendah.

Jumlah pendapatan kumpulan bagi suku dikaji berjumlah RM552.8 juta, menurun sebanyak RM196.9 juta atau 26.3 peratus berbanding RM749.7 juta pada suku pertama tahun kewangan 2025.

Dari segi operasi, kos pengeluaran menurun sebanyak tujuh peratus tahun ke tahun, disokong oleh harga NY11, kadar pertukaran asing dan kos pengangkutan yang lebih rendah.

Walau bagaimanapun, keadaan ini sebahagiannya diimbangi oleh peningkatan 17 peratus dalam kos penapisan berikutan faktor penggunaan kapasiti (UF) yang lebih rendah.

Mengulas mengenai keputusan tersebut, Ketua Pegawai Eksekutif Kumpulan MSM, Dr. Aini Shahar, berkata keputusan suku pertama tahun kewangan 2026 mencerminkan tekanan margin berterusan yang dihadapi oleh industri gula domestik, khususnya disebabkan oleh harga jualan yang lebih rendah, persaingan gula import serta kadar penggunaan yang lebih rendah.

Beliau berkata, walaupun persekitaran operasi kekal mencabar, pihak pengurusan telah mengambil tindakan segera bagi memperkukuh disiplin margin, menyelaraskan pengeluaran mengikut permintaan, dan mengoptimumkan kos di seluruh kumpulan.

"Ketidaktentuan geopolitik yang berterusan berpotensi menyebabkan turun naik yang lebih ketara terhadap harga komoditi, kos pengangkutan serta kadar pertukaran mata wang asing.

"Oleh itu, fokus kami adalah jelas – untuk melindungi aliran tunai, memperkukuh disiplin operasi serta memulihkan keuntungan melalui kawalan komersial yang lebih ketat, pengoptimuman pengeluaran dan pengagihan modal yang berdisiplin," katanya dalam satu kenyataan

MSM terus giat bekerjasama dengan kerajaan untuk memuktamadkan rangka kerja penetapan harga yang mampan bagi melindungi keselamatan makanan negara dan menyokong kelangsungan jangka panjang industri gula domestik.

Sejak 1964, MSM telah memainkan peranan penting dalam industri gula Malaysia.

Kini, sebagai antara 10 penapis gula terbesar di dunia, kumpulan terus memperkukuh kecemerlangan operasi, kemampuan serta keterjaminan makanan, sambil mengambil langkah tegas untuk memperkukuh daya tahan jangka panjang.

HEADLINE	MSM Malaysia alami kerugian sebelum cukai RM13 juta
MEDIA	BH - ONLINE
DATE	26 May 2026 11.35 PM
BY	Wartawan BH
LINK	https://www.bharian.com.my/bisnes/korporat/2026/05/1563959/msm-malaysia-alami-kerugian-sebelum-cukai-rm13-juta